




CIA SIAB

Thaum Nyuaj Siab

BY JOYCE MEYER



CIA SIAB

Thaum Nyuaj Siab

BY JOYCE MEYER

Txheej Txheem

- 5 Lus Qheb Thawj
- 11 Puv Npo Txojkev Cia Siab
- 20 Yuav Ua Li Cas Thaum Koj Daig Mus Tsis Taus lawm.
- 30 Xaiv Muaj Kev Cia Siab
- 37 Cia siab rau Vajtswv Thaum Raug Cua Daj Cua Dub
- 46 Txhua Yam Puavleej Tshiab
- 56 Ntsia Mus Sab Saud Thaum Koj Nyuaj Siab
- 68 Koj Tabtom Ntsib Kev Nyuaj Siab Puas Yog?
- 74 Lus Thov Vajtswv Kom Tau Txais Kev Cawm Dim.
- 77 HAIS TXOG TUG SAU
- 79 LUB KOOMHAUM JOYCE MEYER

Lus Qheb Thawj

Kuv zoo siab uas koj xaiv nyeem phau ntawv no.

Tamsim no, tej zaum koj yuav raug mob lossis ntxhov siab rau tej yam uas tshwmsim hauv koj lub neej. Thiab tamsim no kuv tsis paub tias koj zoo li cas, Kuv paub ib qho uas yog qhov tseeb:

Koj tsis nyob ib leeg—Vajtswv hlub koj, thiab peb kuj hlub koj ib yam nkaus thiab.

Qhov tseeb tiag, Kuv sau phau ntawv no los txhawb koj zog thiab txhawb koj lub siab kom muaj kev cia siab. Kuv xav kom koj paub tias txawm tamsim no, koj yuav ntsib dabtsi los, Vajtswv nyob ntawm koj ib sab thiab tsis muaj dabtsi uas Vajtswv ua tsis tau (saib Lukas 1:37). Nws npaj ua yam zoo rau koj lub neej yav tom ntej, thiab Nws nyob tom koj qab ua haujlwm pab koj (saib Yelemis 29:11).

Tej zaum koj yuav raug tej xwmtxheej phem uas tsis tau pom dua, thiab koj tsis ruaj siab tias yuav kawm

paub qhov xwmtxheej ntawd thiab mus tom ntej tau li cas. Lossis tej zaum koj tabtom raug ceeblaj kev mob kev nkeeg thiab tsis muaj txoj hauv kev yuav mus ntsib kws tshuaj kom kho tau tus mob. Kuv paub tias niaj hnuv no muaj coob tus neeg, tsis paub tias yuav muab mov qhov twg los noj rau puas tom ntej. Thaum peb ntsib tej yam nyuaj heev, peb yuav raug txomnyem kom thim thiab yeem swb. Txawm li cas los xij, qhov loj tshajplaws uas peb ua tau ces yog tso siab rau Vajtswv thiab muaj kev vam ntsoov. Tiamsis qhov tseeb tiag, kev cia siab yog dabtsi?

Kev cia siab yog muaj kev vam uas ruaj siab tias yuav muaj yam zoo tshwmsim. Kev cia siab ntsig txog peb txoj kev ntseeg thiab yam uas peb ntseeg. Thaum peb muaj cuabkav cia siab, nws ua rau peb lub neej muaj kev zoo siab thiab nyob kaj siab lug.

Yeebncuab xav kom peb plam kev cia siab. Nws xav ntxias peb tias txhua yam piam tag thiab tsis muaj qhov yog. Tiamsis Vajtswv xav kom peb muaj kev cia siab - ntseeg thiab cia siab rau tej yam zoo ntawm Nws. Qhov tseeb tiag, phau Vajluskub hais tias Nws yog “Tus

Vajtsww ntawm txojkev cia siab,” puv npo txojkev hlub thiab kev pib dua tshiab (saib Loos 15:13).

Kuv raug kev txomnyem nyuaj siab vim kuv raug kuv txiv mos thaum me ntxhais, raug ua phem, raug cem tej lus phem phem, kuv thiaj tas kev cia siab. Muaj ntau yam kev tsis zoo tshwmsim rau kuv ces qhov ntawd ua rau kuv pheej tos saib tias yuav muaj dabtsi tsis zoo tshwmsim ibtxwm, txawm tias tom qab kuv twb los ntseeg Vajtsww lawm.

Txawm li cas los xij, Kuv hais tau tias Vajtsww hloov kuv ntawm qhov kuv muaj kev xav phem thiab ntsia neeg hauv ntiajteb no phem phem los hloov ua muaj kev cia siab, tos ntsoov Vajtsww txojkev zoo ibtxwm. Nws pab kom kuv nrhiav tau lub hwjchim ntawm kev cia siab thiab qhov ntawd muaj hwjchim rau kuv txoj kev xav, cov lus, tus cwjpwv thiab muaj hwjchim rau txhua yam hauv kuv lub neej ib qho zuj zus mus. Yog li, txawm tias tamsim no thaum kuv ntsib qhov xwmtxheej nyuaj lossis ntsib kev plam, kuv tseem tuav rawv txojkev cia siab, kuv paub tias Vajtsww yuav ua txhua yam zoo rau kuv!

Tej zaum koj raug mob ntau heev, plam kev vam, lossis kev poob qis thiab koj ntsia tsis pom tias txhua yam yuav zoo tuaj tau li cas. Yeebncuab xav kom koj ntseeg tias txhua yam yuav hloov tsis tau. Tiamsis Vajtsww xav kom koj paub tias Nws hlub koj, thiab kom koj tso siab tias Nws yuav ua txujci tseemceeb ntawm koj tej kev ntxhov siab tau. Cia li ua koj feem yog txhob tas kev cia siab - kom cia siab tias Nws txoj kev zoo yuav tshwm txhua lub sijhawm.

Nyob rau hauv phau ntawv no muaj ntau zaj lus qhia uas zoo tshajplaws uas Vajtsww tau qhia kuv txog zaj no – tej zaj lus qhia no yuav txhawb koj txoj kev ntseeg thiab pab kom koj paub kho koj lub neej los ntawm tus cwjpw tshiab tiag tiag.

Kuv pheej hais ibtxwm tias leejtwg kuj xij uas tseem muaj kev cia siab – tseem ntseeg Vajtsww Txojlus thiab tsis kam thim – yog tus uas tsis raug ua kom swb. Vim tias txawm hauv lub neej muaj cua daj cua dub, yog koj ntseeg tso siab hauv Nws, Nws yuav hliv txojkev thajyeeb thiab kev kaj siab los rau koj lub neej thiab ua rau tej xwmtxheej ntawd muaj yam zoo rau koj.

Kuv tsis paub tej uas koj tau ntsib hauv koj lub neej lossis yam uas koj tabtom ntsib rau lub sijhawm no. Tiamsis Kuv paub tias Vajtsww hlub koj kawg, Nws saib ntsoov koj, thiab Nws yuav pab koj (saib Loos 8:38-39; Phau Ntawv Nkauj 33:18).

Nws yog tus Vajtsww ntawm txojkev cia siab txhua yam, thiab Nws yog Tib Tug uas yuav hloov tau koj lub sijhawm nyuaj tshajplaws kom los ua yam zoo tshajplaws tau.

-TSHOOJ 1-

Puv Npo Txojkev Cia Siab

Qee zaum kuv hais tias peb yog cov neeg nyob rau tiam uas “yuavtsum pom ua ntej” tso. Peb xav pom ua ntej es peb mam ntseeg. Qhov tseeb tiag, peb feem coob nyuaj uas yuav ntseeg tias Vajtsww tabtom ua haujlwm rau peb txog thaum peb pom kiag tej ntawd tshwm los ntawm peb lub qhov muag mas mam ntseeg.

Tiamsis qhov ntawd tsis yog Vajtsww txoj kev ua haujlwm – Nws ua haujlwm nyob tom qab tej xwmtxheej. Tej zaum koj ntsia tsis pom tias muaj dabtsi tshwmsim, tiamsis koj puas ntseeg tias Vajtsww tabtom ua haujlwm rau tej yam hauv koj lub neej tamsim no? Koj puas ntseeg tias Nws npaj yuav pab koj tus menyuam, pab koj lub neej txijnkawm, lossis tej yam uas koj tau thov Vajtsww los ntau xyoo lawm?

Yelemis 29:11 hais tias Vajtsww npaj yam zoo rau koj lub neej...kom koj muaj kev cia siab hauv koj qhov

kev tshwmsim zaum kawg. Muab hais yoojyim ces yog, Vajtsww tabtom nrhiav sijhawm yuav ua qhov zoo rau koj!

Tej zaum nws nyuaj uas yuav xav txog koj tus kheej tias koj yog ib tug neeg uas puv npo kev cia siab, muaj kev ntseeg, thiab xav rau qhov zoo. Yog koj zoo li ntawd, Kuv paub zoo tias koj xav li cas! Muaj ib txhia ntshai uas yuav cia siab vim lawv tau plam txujkev vam ntau heev thiab tsis xav tias lawv puas yuav ntsib tau tej kev mob uas ntau tshaj qhov ntawd ntxiv lawm.

Tiamsis tsis ua cas, vim Vajtsww yog “tus Vajtsww ntawm txojkev cia siab, “ Nws puv npo txojkev hlub thiab kev pib dua tshiab (saib Loos 15:13). Thiab los ntawm Nws, yeej tsis lig dhau uas yuav pib ntseeg, cia siab, muaj kev vam.

Kev Vam Uas Zoo Tshaj...

Lub ntsiab lus ntawm kev vam yog “vam yam zoo thiab los ntawm ntseeg cia siab.”

Kuv ntseeg tias ntau zaus peb coj tus cwjpw qeeb siab, peb tsuas txiav txim siab yuav “tos saib” seb puas muaj dabtsi hloov lossis “tshwmsim” yam zoo rau peb

xwb. Tiamsis Vajtsww xav kom peb muaj kev vam raws li Nws lub homphiaj. Nws ntshaw kom peb vam tej yam zoo.

Yog li ntawd, Kuv xav nug koj tias; koj tabtom vam dabtsi?

Koj pom dabtsi hauv koj lub siab thiab kev xav? Koj hais txog koj lub neej yav tom ntej li cas? Thaum koj sawv los, koj puas xav li no tias, kuv twv tias kuv yuav sim ua kom dhau ib hnuv. Lossis koj sawv los nrog kev vam tias hnuv no yog hnuv uas koj yuav tau txais koj li kev kovyeej puas yog?

Lolus uas tsimnyog peb siv rau tus pojniam xeeb tub tias nws tabtom “tos yam muaj kev vam.” Thiab thaum sijhawm yim dhau mus, nws yim vam ntsoov nws tus menyuam yuav yug los.

Kuv kev xeeb menyuam mas tshwjxeeb kawg vim kuv hai kuv plaub tug menyuam tshaj lawm ib hlis es tsis yug. Kuv tus kws tshuaj hais rau kuv tias kuv yog tib tug pojniam uas nws paub es xeeb menyuam ntev npaum li tus maum ntxhw.

Txog thaum hnuv yug menyuam txhua zaus, Kuv sawv los txhua hnuv thiab hais tias, “hnuv no yuav yog hnuv ntawd – nws yuavtsum yog hnuv ntawd!” Kuv twb npaj khaubncaws ntim hnuv thiab npaj txhij lawm. Kuv tshawb xyuas ob zaug – tshuaj txhua yam thiab ruaj siab tias tej khoom npaj txhij lawm, Kuv ntseeg tias kuv tus menyuam yuav yug txhua lub sijhawm ntag. Txhua zaus uas kuv mob plab, Kuv xav kiag tias, los lawm! Txog sijhawm lawm!

Vajtswv xav kom koj ua li no rau Nws! Nws npaj yam uas xav tsis thoob rau koj lub neej, thiab Nws xav kom koj vam tej yam zoo uas tabtom tos nyob ze tom ntej no.

Kev cia siab hais tias: “tej yam ntawd zoo li no los ntev lawm, tiamsis Vajtswv yog tus Vajtswv uas ua tau, thiab tej yam yuav hloov tau.”

KOJ PUAS YOG TUS NEEG RAUG TXIM UAS MUAJ KEV CIA SIAB?

Raws li uas kuv twb piav lawm tias, kuv tau ua tus neeg uas xav phem tshajplaws li uas kuv paub los. Kuv ntsia lub ntiajteb no phem ibtxwm – kuv ntsia txhua

yam phem tagrho ibtxwm.

Qhov ntawd piav qhia tias vim li cas kuv thiaj ntxim khuvleej heev. Kev tsis ntseeg thiab tej kev xav phem ua rau yus poob qis...tiamsis kev cia siab ua rau peb zoo siab.

Kev cia siab txhais tias kev muaj txojkev xav lossis cwjpwmm zoo. Tus neeg uas puv npo kev cia siab yeej tsis kam ua qhov tsis zoo txhua yam. Txawm tias lawv lees paub thiab daws tej cua daj cua dub hauv lub neej, hauv tej kev xav, kho tus cwjpwmm thiab tej kev hais lus los lawv tseem muaj kev cia siab.

Muaj ntau zaus, uas Kuv xav tias peb mag ntxiab ntawm tos kom txog thaum peb zoo siab lossis muaj kev cia siab. Tiamsis kev cia siab yog kev txiav txim siab ua tus neeg xav zoo thiab tsis ua lub neej mus raws peb txoj kev xav. Qhov tseeb tiag thaum peb txiav txim siab zoo los xav txog qhov zoo, thiab xav yam muaj kev cia siab, peb txoj kev xav yuav mus raws li xwb ntag!

Kuv nyiam phau Xakhaliyas 9:12. Uas tus Tswv hais tias, *Cov neeg uas raug luag kaw uas tseem muaj vam 'e, cia li rov qab mus rau nej lub chaw ruaj khov.*

Hnub no kuv tshaj tawm rau nej tias, kuv yuav thim ob npaug rau nej.

Kev ua “tus neeg raug txim uas muaj kev cia siab” txhais li cas? Nws txhais tias qhov uas peb tsis tag kev vam thiab tso siab plhuav rau Vajtsww tus peevxwm uas yuav pab kom peb dhau mus tau, tsis hais dabtsi yuav tshwmsim rau peb lub neej los xij.

Thaum koj ua tus neeg raug txim uas muaj kev cia siab, yeebncuab tsis paub tias yuavtsum ua dabtsi. Nws yuav los tawmtsam koj los ntawm kev xav tsis zoo, tiamsis nws tsis muaj hwjchim ua phem rau koj tau thaum koj txiav txim siab uas yuav tso siab rau koj tus Vajtsww ntxiv mus.

Vajtsww xav foom koob hmoov rau koj thiab pub koob hmoov rau koj ob npaug rau kev mob dhau los thiab rau tej yam uas plam dhau los (saib Yaxayas 61:7). Nyob rau ntawm peb feem yog yuavtsum ua yam uas txawv dua qub yog ntseeg, cia siab thiab muaj kev vam.

TXOG SIJHAWM TSO PLAUB TOG HLAU NRES NKOJ TOM TW LAWM.

Henplais 6:19 hais tias, [Nimno] peb muaj [kev vam] zoo ib yam li tog hlau nres nkoj uas ruaj thiab tso siab tau uas tuav tau peb lub siab [tsis nplua thiab tsis ua rau leejtwg kuj xij uas taug kev mus saum ntawd puastsuaj]...

Cia peb los kawm nqe Vajluskub no kom tob. Tamsis no, Kuv xav tias peb sawvdaws paub lawm tias tog hlau nres nkoj yog dabtsi. Thaum koj xav kom lub nkoj nres, koj yuavtsum tso tog hlau, thiab lub nkoj yuav mus deb tau li tso tog hlau ntawd xwb.

Nqe Vajluskub no qhia hais tias “tog hlau hauv lub siab.” Peb lub siab muaj ob peb yam li no; muaj kev xav, kev npaj siab, kev zoo siab, thiab chim siab. Peb lub siab qhia peb txog yam uas peb xav, yam uas peb xav tau thiab yam uas peb hnov.

Yog li tagnrho no txhais li cas? Nws txhais tau hais tias thaum saib zoo li txhua yam phem...thaum saib zoo li tsis muaj qab tsis muaj hau, thiab nws zoo li Vajtsww tej lus cog tseg tsis muaj hnuv yuav muaj tseeb hauv

peb lub neej, kev cia siab yog tog hlau uas rub peb rov qab los thiab hais tias, “tuav cia! Nws yeej yuav tshwmsim xwb!”

Tiamsis cia peb los saib ntxiv mentsis. Nyob hauv Henplais 6:19 hais tias kev cia siab yog peb tog hlau thiab nws...[tsis nplua thiab tsis ua rau leejtwg kuj xij uas taug kev mus saum ntawd puastsuaj]...

Kev cia siab yog peb tog hlau thiab yog yam uas ua rau peb yuavtsum “kauj ruam mus.” Muaj qee tus tsis tau ntsib Vajtsww tej lus cog tseg thiab Vajtsww lub hwjchim vim yog lawv tsis kauj ruam los ntawm kev ntseeg xwb. Kev kauj ruam mus yuav ua rau Vajtsww tej lus cog tseg maj ua haujlwm.

Cia kuv muab ib qho pivtxwv rau koj. tshaj li 40 xyoo, uas kuv tau taug kev mus thoob ntuj thiab qhia Vajtsww Txojlus. Tiamsis kuj tseem muaj lub sijhawm ua ntej uas yuav pib kev sablaj uas kuv xav tias tsis muaj kev tsa, tsis tau zoo txaus yuav qhia lossis tsis txhij uas yuav ua yam uas kuv tabtom yuav ua ntawd.

Ua ntej yuav nce mus saum samthiaj, kuv hais hauv siab tias; Vajtsww aw, menyuam vam tias Koj yuav tshwm los saum samthiaj no tsis yog li mas menyuam poob ntsej muag. Ces kuv kuj kauj ruam mus ua yam uas kuv ntseeg tias Nws thov kom kuv ua, Vajtsww los thiab pab kuv qhia txojlus ibtxwm. Tsis muaj ib zaug uas Nws tsis pab kuv.

Nej coob leej, Vajtsww tabtom tos kom nej kauj ruam mus saum tog hlau ntawm kev cia siab. Nws tsuas tos nej ua nej feem kom Nws yuav tshwm los hauv nej lub neej tau thiab ua yam uas koj xav tsis thoob.

Txhob cia tej xwmtxheej hauv koj lub neej ntsawj koj ya mus. Tiamsis cia li tso koj tog hlau thiab kauj ruam mus saum lub hauvpaus ntawm kev cia sia uas ruaj khov. Vim thaum koj tso koj txoj kev cia siab hauv Vajtsww, koj yuav tsis plam kev vam hlo li.

-TSHOOJ 2-

Yuav Ua Li Cas Thaum Koj Daig Mus Tsis Taus lawm

Koj puas tau nyob rau qhov uas daig es mus tsis taus lawm? Koj puas tau nyob rau lub neej uas zoo li tws kev...tsis muaj txoj hauv kev twg yuav mus tau lawm?

Kuv tau nyob rau qhov tws kev ntawd ntau zaus, thiab Kuv kuj paub tseeb tias tibneeg feem coob kuj nyob rau qhov tws kev ntawd los lawm. Tiamsis kuv ua Vajtswv tsaug uas Nws qhia kuv ntau xyoo tias txawm thaum kuv daig es mus tsis taus los, tsis muaj dabtsi nyuaj dhau rau Vajtswv ua tsis tau.

Cia peb los pib saib Yauxej zaj nyob hauv Chivkeeb (Chivkeeb 37-50). Vajluskub hais tias Yauxej yog tus tub uas leejtxiv hlub tshaj ntawm cov tub 12 leej, thiab qhov ntawd ua rau cov tijlaug khib nws heev.

Muaj ib hnuv Yauxej piav nws zaj npau suav rau nws cov tijlaug mloog. Nyob rau hauv zaj npau suav cov tijlaug nyo hau pe nws. Qhov uas nws hais li ntawd, tsis ua rau muaj yam zoo tshwm los li!

Yam uas tshwm los ces yog, cov tijlaug nrhiav kev tua Yauxej povtseg. Thawj yam, lawv muab Yauxej pov rau hauv lub qhov tshij kom cia nws tuag hauv. Tiamsis ntxiv los lawv txiav txim siab muab nws muag mus ua qhev rau ib pab tub ua luam neeg Yisamayees. Ces lawv ntaus tswvim dlag lawv txiv tias Yauxej tuag lawm.

Raws li koj twb paub lawm tias, zaj no xaus rau kev muaj yeej. Yauxej tau ua tus muaj hwjchim uas me mentsis ntawm Falaus xwb, thiab rov qab tau nrog nws tsevneeg sib raug zoo, thiab sawvdaws tau txais kev zam txim.

Yam uas tshwmsim rau Yauxej yog povthawj qhia tias tsis hais koj yuav ntsib dabtsi hauv lub neej, yeej muaj kev vam ibtxwm. Koj ua rau Vajtswv lub homphiaj tiav tau vim Vajtswv ua tau txhua yam.

Feem uas peb yuav los saib hauv Yauxej lub neej yog yam uas tshwm nyob rau ntu uas nyob hauv lub

qhov tshij mus txog hauv Vajntxwv lub loog. Yauxej lub neej hloov ntau zaus rau lub sijhawm ntawd. Tiamsis ib qho cwjpwv uas coj nws mus txog kev muaj yeej thaum kawg yog kev ua siab ntev. Vim Yauxej txojkev ntseeg hauv Vajtswv, nws thiaj tsis yeem swb.

KEV YEEM SWB TSIIS YOG KEV TAWM.

Nyob rau hauv peb lub neej ntag, tej zaum peb yuav poob lub qhov taub ib ntus. Tej zaum yog lub qhov ntawm kev mob kev nkeeg, lub qhov uas tu ncuaj nyiaj txiag, muaj teebmeem kev sib raug zoo lossis lwm yam teebmeem. Tsis hais thaum twg uas yam ntawd tshwmsim, koj yuavtsum ua siab tawv qhawv tias tsis hais xwmtxheej yuav zoo li cas los xij, koj yuav tsis yeem swb!

Thov nco ntsoov ibtxwm tias, kom muaj lus timkhawv zoo txog yam uas Vajtswv tau ua, peb yuav dhau kev txomnyem ua ntej. Yexus hais rau peb tias:

...Nej yuav raug kev txomnyem nyuaj siab hauv lub ntiajteg no, kev sim siab, kev ntxhov siab, plam kev vam, tiamsis nej cia li ua siab tuab. [ua siab tawv qhawv, ruaj siab, tsis ntshai dabtsi li] vim Kuv twb

kovyeej ntiajteb lawm. [Kuv twb hle lub hwjchim uas yuav ua phem rau nej thiab twb kovyeej lub hwjchim ntawd lawm] (Yauhas 16:33).

Koj yuav khiav tsis dhau tej yam kev nyuaj. Tej zaum koj yeem swb. Tiamsis yog koj thev thiab tso siab rau Vajtsww pab koj txhua yam, Nws txhawb koj tau. Nws ua kom txhua yam kev phem hloov ua qhov zoo tau (saib Loos 8:28).

Muaj neeg piav hais tias Xh.Winston Churchill tau hais lus txhawb zog rau cov tub kawm ntawm lub tsev ntawv Harrow, xyoo 1941 tias:

“Tsis muaj hnuv, tsis muaj hnuv, tsis muaj hnuv, tsis muaj hnuv, tsis muaj hnuv yeem swb! Tsis hais qhov loj lossis qhov me, loj lossis me – tsis muaj hnum yeem swb!”

Kuv tsis paub meej tias nws hais li ntawd xwb puas yog, tiamsis kuv ntseeg tias Vaj Ntsujplig tus Dawbhuv tabtom hais rau peb hnuv no tias – “txhob yeem swb, vim Vajtsww npaj tseg cia rau koj lub neej lawm!”

Kev yeem swb yog yam yoojyim ua kawg thaum peb ntsib tej yam nyuaj. Qee zaum tibneeg daig es mus

tsis taus ntxiv thaum lawv tsis paub tias yuav mus li cas, yog li lawv xaiv qhov yeem swb kuj yoojyim rau lawv ua.

Tej zaum lawv xav tias lawv tsis txawj ntse lossis txawj tsis txaus; tej zaum muaj tej yam txaus ntshai tshwm rau lawv; lossis lawv ua tsis tiav tej yam lossis tau ua yuam kev dhau los lawm.

Tiamsis Vaj Ntsujplig tus Dawbhuv pub lub zog thiab kev txawj rau peb kom mus, kom mus tom ntej thiab mus kom txog kev muaj yeej, txawm tias txhua yam yuav tsis zoo li peb npaj tseg kuj xij.

Kev ua tsis tiav tsis tau txhais tias tsis muaj lwm txoj kev xaiv ntxiv lawm. Koj kawm tau ntawm yam uas ua yuam kev dhau los tau - kuv ntsib kuv qhov keebkwm uas yuav ua rau kuv ua tus qhia zoo tau! Thaum txhua yam ua tsis tiav, rov sim ua dua. Rau qhov yam tsawg los koj yuav tau kawm paub tias ua dabtsi tau thiab ua dabtsi tsis tau thiab pib ntawm theem ntawd mus. Koj hloov teebmeem ua sijhawm zoo tau kom yuav ntse zog tuaj thiab ua tus neeg paub tab sab ntsujplig ntau zog tuaj.

Vajtswv xav kom peb muaj lub neej zoo, tiamsis yuavtsum muaj kev tso siab thiab ua siab ntev. Vaj Ntsujplig tus Dawbhuv yuav coj peb mus ib kauj ruam rau ib kauj ruam los ntawm txojkev ntseeg kom mus rau hauv qhov phiajxwm zoo uas Vajtswv npaj tseg rau peb txhua tus. Peb feem ces yog yuavtsum kauj ruam mus...thiab txhob yeem swb!

Yuav ua li cas thaum koj raug mob.

Koj txoj kev ua siab ntev thaum koj nyob hauv lub “qhov taub” yuav ua rau muaj kev hloov tau.

Nco ntsoov tias, nws yog lub sijhawm raug sim... nws yog lub sijhawm uas koj tus cwjpw yuav raug kho. Lub sijhawm no kuv pheej hu tias yog “xyoo nyob tus yees” vim tias nws yog lub sijhawm uas koj xav tias tsis muaj dabtsi tshwm hauv koj lub neej ntau.

Lossis tej zaum koj yuav raug mob ntau heev thiab muaj kev kub ntshov, thiab zoo li Vajtswv tsis ua dabtsi txog qhov ntawd li. Tiamsis qhov tseemceeb yog koj tso siab rau Nws thaum lub sijhawm ntawd, vim Nws tabtom ua haujlwm hauv koj lub siab kom koj yuav zoo li Yexus Khetos zuj zus.

Yog li koj yuavtsum ua li cas thaum koj nyob hauv koj lub qhov taub?

- Txhob yeem swb! Tawmtsam kev sim siab kom xav tias tsis muaj kev tawm rau koj qhov xwmtxheej lawm. Yexus yog txoj kev. No yog sijhawm uas koj yuav nyob ze thiab raws Nws qab.
- Tsis txhob thuam Vajtswv lossis xav tias Nws rau txim rau koj vim kev txhaum qee yam. Nws tsuas siv qhov xwmtxheej ntawd kom ua haujlwm hauv koj lub neej xwb. Thiab txawm tias nws ua rau koj tsis zoo siab li, tiamsis Nws lub homphiaj yuav zoo rau koj ibtxwm.
- Ua qhov yog txawm tias thaum koj raug mob, thaum nws tsis zoo siab lossis thaum lwm tus ua phem rau koj. Ua yam zoo rau ntau tus neeg raws li koj ua tau ntau npaum li koj ua tau.
- Tsis txhob thim thiab tsis txhob chim tsis hais lus lossis tsis txhob cais koj tus kheej ntawm lwm tus. Nco ntsoov tias, koj yuav ua rau koj ntxim khuvleej lossis ntxim hwm kuj tau, tiamsis koj ua tsis tau ob

qhov ntawd! Ntau zaus, Vajtswv yuav siv lwm tus los txhawb koj zog rau lub sijhawm no.

- Ceev koj cov lus thiab koj lub koob meej cia. No yog sijhawm kho cwjpw, thiab koj tabtom raug npaj kom koj mus nyob rau koj lub meejmom hauv “Vajntxwv lub loog.”
- Tsis txhob tso kev ntseeg tseg...tsis txhob tas kev cia siab tias Vajtswv kho tsis tau koj qhov xwmtxheej kom zoo tuaj!

Xyeeb povtseg.

Tej zaum koj twb hnov ib zaj uas hais txog ib tug nees luav uas poob hauv lub qhov taub lawm.

Thaum tabtom saib seb dabtsi tshwmsim, tus tswv nees luav kuj xav ib npliag, ces thiaj txiav txim siab tias lub qhov taub ntawd kuj tob thiab tus nees luav ntawd kuj laus dhau lawm, yog li nws thiaj txiav txim siab muab tus nees luav ntawd faus rau hauv lub qhov taub ntawd.

Nws hu cov phoojywg thiab tej kwvtij zejzog tuaj pab, ces lawv pib yawm av rau lub qhov taub.

Thaum xub thawj tus nees luav quaj, pom tseeb tias nws ntshai rau nws qhov xwmtxheej. Tom qab ntawd, tus tswv pom tias tus nees luav lub suab ntsiag lawm thiab nws xav tias ntshe nees luav tuag lawm. Tiamsis tus nees luav tsis tau tuag.

Thaum tus tswv ntsia rau hauv lub qhov taub, nws ntsia pom tias txhua zaus uas av poob rau hauv yog poob rau saum tus nees luav lub nraubqaum, tus nees luav muab xyeeb povtseg ces nws tsuj cov av ntawd thiab khaws cov av ntawd cia hauv nws qab rau taw. Ua li no ntau teev, ces thaum kawg tus nees luav ntawd muaj av nyob hauv qab rau taw ntau txaus uas yuav ua rau nws siab zog tuaj ces nws tawm hauv lub qhov taub los.

Peb kawm tau tej yam ntawm tus nees luav. Lub neej yuav txawb av rau peb ib zaug tag ib zaug thiab. Tej zaum yog kev sib raug zoo lossis peb tej nyiaj txiag lossis kev noj qab haus huv. Tiamsis no yog lub sijhawm uas peb yuavtsum kawm paub raws qab Vaj Ntsujplig tus Dawbhuv kev coj. Nws yuav qhia tias peb yuav xyeeb av tawm mus li cas thiab tsuj av li cas, yuav ua rau koj pom Nws lub tshwjchim hauv txhua kauj ruam uas koj

kauj ruam tawm ntawm koj lub qhov taub mus rau koj lub loog.

Yeej yuav muaj teebmeem rau kev muaj yeej ibtxwm. Yuav muaj “tej teebmeem” dhau los ibtxwm. Tiamsis yuav muaj kev ua dua tshiab ntxiv ibtxwm, yuav muaj sijhawm zaum ob ibtxwm thiab yuav muaj kev pib dua tshiab ibtxwm thiab.

Nws yeej tsis lig dhau - tsis txhob yeem swb! Thaum koj ua koj feem thiab ua yam uas koj ua tau – thaum koj tuav kev cia siab cia, kauj ruam tom ntej, thiab tsis kam tso kev cia siab hauv Vajtsww tseg – Nws yuav ncaj ncees ua yam koj ua tsis tau.

Yog li ntawd, yog hais tias koj daig es mus ntxiv tsis tau lawm thiab tsis paub tias yuavtsum ua li cas, tsis txhob tas kev cia siab, vim koj nyob rau qhov chaw uas zoo tshajplaws rau kev pib dua tshiab lawm.

-TSHOOJ 3-

XAIV MUAJ KEV CIA SIAB

Vim kuv raug mos thaum me ntxhais los lawm, Kuv thiaj muaj kev ntshai tias tej yam kev phem yuav tshwm ibtxwm. Zaj uas kuv hais no yuav ncaj koj lub neej thiab.

Muaj ntau yam kev phem tshwm rau kuv txog qhov uas kuv xav ibtxwm tias tej kev phem ntawd yuav tshwm tuaj rau kuv txhua lub sijhawm, txawm tias tom qab kuv los ntseeg Vajtswv kuj xij.

Kuv nco tau tias muaj ib hnuv thaum sawv ntxov kuv thov Vajtswv thiab nug Vajtswv tias “No yog dabtsi os Vajtswv? Ua cas menyuam yuav xav li no ibtxwm?”

Vajtswv hais rau hauv kuv lub siab tias, “Nws yog kev xav phem xwb.” Kuv tsis tau hnov lo lus ntawd ua ntej, tiamsis ob peb hnuv tom qab ntawd kuv pom nws hauv Pajlug 15:15, uas hais tias...

Cov neeg uas raug kev txomnyem lub niaj xyoo puavleej phem [vim kev txhawjxeeb thiab pheej xav tias yuav muaj tej yam los raug], tiamsis cov uas lub siab xyivfab muaj kev pam noj pam haus tsis tu li [tsis xav txog tej xwmtxheej].

Peb txhua tus puavleej yuav tau ntsib lub sijhawm nyuaj hauv lub neej, thiab thaum peb ntsib mas nws yoojyim uas yuav ntshai lub neej yav tom ntej thiab muaj kev ntxhov siab thiab xav tias yuav muaj dabtsi tshwmsim. Tiamsis peb yuavtsum los txog qhov uas pom zoo nrog Vajtswv thiab Nws Txojlus thaum muaj teebmeem.

Peb yuav tuav rawv peb txojkev ntseeg hais tias, “Kuv paub tias Vajtswv hlub kuv. Nws yuav saib xyuas kuv thiab tsomkwm kuv. Kuv ntseeg tias Nws yuav muab txoj kev tshav ntuj thiab lub zog rau kuv kom kuv ua yam uas kuv yuavtsum ua, thiab yam zoo yuav tshwmsim.

TXHOB NTSHAI!

Vajtsww yeej tsis xav kom peb nyuaj siab lossis muaj “hnuv txaus ntshai,” txawm tias tej yam tsis mus raws li peb xav tau. Nws xav kom peb vam yam zoo thiab tseem nyob rau hauv kev cia siab puv npo, es tsis txhob xav txog peb qhov xwmtxheej.

Thiab muaj ob lolus uas pab koj ua qhov no tau yog: Txhob ntshai.

Kev ntshai yog dabtsi? Kev ntshai yog kev xav tias yuav tau ntsib tej yam tsis xav ntsib - nws yog qhov txawv kiag ntawm kev cia siab.

Mas twb tsis paub txog qhov no, Kuv xav tias muaj coob tus ntshai yam uas lawv yuav tau ntsib ntawm txhua txhua hnuv. Peb yeej ntshai mus ua haujlwm, ntshai tsheb coob, ntshai tau ua mov, ntshai ntxhua khaubncaws, ntshai txiav nyom, ntshai tau ua hmo, thiab ntshai ntau yam.

Txawm li cas los xij, kev ntshai nyiag tau peb txoj kev xyivfab thiab ua rau peb lub neej puas tau. Kev ntshai ua rau tas kev cia siab. Tsis txhob ua li ntawd, kuv xav txhawb kom nej tsis txhob nyuaj siab txog yam

koj ua tsis tau. Cia li xaiv muaj kev kaj siab thiab cia Vajtsww saib xyuas tej ntawd!

Hauv txhua qhov xwmtxheej, peb yuavtsum muaj tus cwjpwmm uas hais tias, “Kuv ua tau yam uas kuv yuavtsum ua, thiab kuv yuav tsis tso tseg kev txaus siab rau kuv lub neej, txawm tias yuav muaj dabtsi tshwm kuj xij. Kuv tsis tau npaj rau qhov no, tiamsis kuv paub tias Vajtsww ua tau txhua yam kom zoo rau kuv.”

Kuv tsis tau hais tias qhov no yuav ua rau koj tej teebmeem ploj mus tas li. Tiamsis xaiv qhov uas tsis txhob ntshai yuav ua rau lub neej zoo dua!

NRHIAV KEV XYIVFAB HAUV TEJ YAM ME ME

Kev muaj yeej hauv lub neej tsis yog hais txog yam “loj” hauv lub neej xwb-nws pib los ntawm yam me me. Tus Tswv xav kom peb muaj peevxwm muaj kev vammeej thiab muaj kev xyivfab hauv txhua qhov ntawm peb lub neej, thiab kovyeej kev ntshai yog ib feem tseemceeb ntawm qhov ntawd. Kev xaiv uas yuav muaj cwjpwmm kev xav zoo thiab puv npo kev cia siab yuav ua rau muaj kev hloov tau tiag tiag.

Yeej muaj tseeb tias, yuav muaj tej yam hauv lub neej nyuaj zog lossis kev zoo siab tsawg zog; txawm li cas los xij, tej yam no tsis tas yuav ua rau peb nyuaj siab lossis ua rau peb lub neej puas. Qhov kev xaiv yeej nyob txij ntawm peb thiab tus cwjpwmm uas peb xaiv coj.

Nws yog qhov txawv kawg uas peb paub tu siab rau peb tus kheej thiab cia peb tus cwjpwmm ua rau peb lub neej puas thiab lwm tus lub neej puas. Ntseeg kuv maj, kuv paub zoo - Kuv ua qhov no tau zoo heev “kuv yog tus raug txim tuag” thaum los ua haujlwm hauv tsev.

Kuv ncig mus hauv tsev ua ntsej muag chim rawv, yws tej yam li no, “Cas yuav zoo ua luaj lauj, txhua tus neeg nyob ib puag ncig no vam kom kuv ua txhua yam. Dave tawm mus ntaus pob thiab cov menyuam ua rau kuv npau taws. Kuv ua mov rau lawv noj thiab ntxuav lawv cov tais diav thiab ntxhua khaubncaws rau lawv huvsi. Kuv xav paub tias puas muaj leejtwg mob siab kuv naj!”

Qhov tseeb tiag, tsis muaj leejtwg yuam kom kuv ua tej ntawd. Kuv xaiv ua ib leeg xwb vim kuv hlub kuv tsevneeg. Tiag tiag mas kuv tsimnyog zoo siab tiamsis kuv ho muaj cwjpwmm tsis zoo.

Koj paub zoo puas yog? Koj qhov xwmtxheej yuav tsis yog hais txog kev ua haujlwm hauv tsev, tiamsis peb sawvdaws raug sim siab kom tu siab rau yus tus kheej thiab ntshai tej yam rau tej lub sijhawm lossis lwm qhov.

Txawm tias muaj tej yam phem lossis tej yam nyuaj tshwm rau peb, peb xaiv ua qhov zoo tau. Thaum peb ua li ntawd, peb pom zoo nrog Vajtsww, vim Vajtsww ua qhov zoo ibtxwm.

TSOM NTSOOV UA QHOV ZOO.

Kuv pheej txhawb kom tibneeg “Uasi Kev Zoo Siab.” Nws yog dabtsi? Thaum koj ntsib teeb meem tsis zoo, xaiv saib qhov zoo.

Xws li, yog tias koj ntsib tsheb coob mus tsis tau, kom hais li no, “Kuv tabtom khiav qeeb qeeb thiab raws qab lwm tus lub tsheb, tiamsis tej zaum Vajtsww tabtom tsomkwm kuv ntawm tsheb sib tsoo uas yuav tshwm tuaj yog tias kuv tsav tsheb ceev tshaj no.

Qhov no siv tau rau txhua qhov xwmtxheej, loj lossis me. Txawm tias nws yog qhov tseemceeb xws li poob haujlwm, koj xaiv tsom ntsoov mus rau qhov zoo tau thiab hais tias, “Tej zaum kuv yuav poob haujlwm, tiamsis tamsim no kuv muaj sijhawm saib Vajtswv kev npaj tes haujlwm zoo dua li yav tas los rau kuv lawm!”

Vajtswv Txojlus hais tias,...*Yawmsaub tos nrhw [los ntawm lub siab kub lug] yuav [vam, nrhiav kev, thiab xav] hlub nej... nws sawv tsees khuvleej nej...*(Yaxayas 30:18).

Tsis tseemceeb tias lub neej yuav coj mus qhov twg, Vajtswv yeej muaj lub homphiaj ua kom nws zoo dua – lub homphiaj uas puv npo kev cia siab thiab yam zoo zoo. Kuv thov txhawb kom koj pom zoo nrog Vajtswv.

Thov kom txhua hnuv koj yuav puv npo txoj kev xav zoo, muaj kev cia siab thiab xaiv qhov uas tsis ntshai. Thaum koj ua li no, Kuv ntseeg tias koj yuav ntsib kev zoo siab hauv lub neej txhua phab.

-TSHOOJ 4-

CIA SIAB RAU VAJTSWV THAUM RAUG CUA DAJ CUA DUB

Tau ntau xyoo los lawm, Kuv tau kawm paub tias nws yog ib yam uas yuavtsum tso siab rau Vajtswv kuj yog ib qho - tsis hais kev hloov qee yam lossis tej leeg hauv koj lub neej - tiamsis kev cia siab rau Vajtswv hauv tej yam kuj yog dua ib qho uas tsis sib thooj li.

Kuv tau txais kev txhawb ntau kawg los ntawm Yaxayas 43:2-3. Uas hais tias, *Thaum koj hla dej kuv yuav nrog nraim koj, thaum koj hla tus niag dej, dej yuav tsis nyab koj, thaum koj hla hluavtaws, koj yuav tsis kub hnyiab, thiab nplaim taws yuav tsis kub koj. Vim kuv yog Yawmsaub, yog koj tus Vajtswv...*

Thaum koj ntsib kev nyuaj siab, nws tseemceeb heev uas yuavtsum nco ntsoov tias Vajtswv nyob ntawd nrog koj, thiab koj tso siab tau rau Nws kom pab koj dhau los.

Xws li, tej zaum nws nyuaj uas tseem yuav muaj kev ntseeg thaum koj tej xwmtxheej tsis muaj qab tsis muaj hau lossis zoo li lub neej tsis tau txais kev ncaj ncees. Nws yog yam nyuaj kawg tshwj yog thaum koj xav tias koj ua yam koj yuavtsum ua tiamsis koj tsis tau txais txiaj ntsig zoo.

Lossis li no ne: koj pom tej leeg ua yam tsis yog, tiamsis laww tseem tau yam zoo dua koj! Nws yuav muaj tej lub sijhawm hauv koj lub neej uas txhua yam zoo li tshee hnyo thiab tsis muaj kev nyabxeeb, tsuas muaj lus teb tib qho xwb yog tso siab rau Vajtsww thiab tuav rawv rau kev tso siab rau Nws xwb.

Kuv kawm paub yam kuv tau ntsib tias Vajtsww yuav siv lub sijhawm li no los pab peb. Thaum lub neej tsis ruaj tsis khov, Nws yuav siv peb tej xwmtxheej los pab peb kom nyob ze Nws thiab tuav ruaj rau peb - tus Tswv Yexus - tus uas yog lub pobzeb ntawm txoj kev cawm dim - tus uas tsis raug ua kom txav chaw lossis tsis tshee hnyo! (Saib Nkawv Nkauj 62:2, 6).

“LOJ HLOB” LOS NTAWM LUB SIJHAWM NYUAJ SIAB”

Mloog mas ntxim luag, tiamsis kuv los txog qeb uas kuv ntseeg tias tej kev nyuaj yog phoojywg zoo tshajplaws. Vim li cas? Vim tias Vajtsww siv tej yam no los qhia peb, cobqhia peb, thiab pab peb loj hlob los ntawm txoj kev uas peb tus kheej ua tsis tau.

Nyob hauv Yakaupaus 1:2-3 qhia rau peb tias, *Cov kwvtij, thaum nej raug ntau yam kev nyuaj siab, nej cia li suav hais tias yog nej tau koob hmoov zoo kawg. Rau qhov nej twb paub lawm hais tias yog nej ua siab ntev nyiaj tej kev nyuaj siab, ces tej ntawd yuav ua rau nej muab siab rau ntseeg ntxiv.*

Kev sim siab thiab kev txomnyem tsis yog los ntawm Vajtsww, tiamsis Nws yuav siv tej ntawd los ua kom peb muaj zog thiab pab peb muaj kev thajyeeb nyabxeeb, muaj lub neej ruaj khov thiab vammeej.

Lub sijhawm nyuaj siab hauv lub neej ua rau peb tau txais kev txhim kho kom ua tus neeg uas peb xav ua. Thaum peb ntsib ib qho xwmtxheej uas “dhau peb

lub zog lawm,” tej xwmtxheej ntawd yuav pab peb kom vam khom Vajtswv, vim peb paub tias peb daws tej teebmeem ntawd los ntawm peb tus kheej tsis tau.

Vajtswv xav kom peb los cuag Nws kom peb muaj zog thiab kom los txog qhov uas peb muaj peevxwm nyob ruaj khov tau txawm tias peb yuav ntsib kev sim siab hauv lub neej. Nws xav kom peb muaj kev xyivfab thiab txaus siab rau Nws, txawm tias peb qhov xwmtxheej tsis zoo tagrho (saib Nehemis 8:10).

Zoo li lub kub uas raug nchuav, Vajtswv pheej siv kev nyuaj siab hauv peb lub neej kom ua rau peb txo hwjchim, kom hloov peb tus cwjpw, kom hloov peb zoo li Nws tus yamtxwv...thiab npaj peb kom txhij rau tej kev zoo uas Nws npaj tseg rau peb lub neej yav tom ntej.

TEJ KEV SIM SIAB PAB KOM PEB MUAJ KEV TSO SIAB

Muaj kev ywjpheej loj heev hauv kev tso siab rau Vajtswv. Thaum muaj tej yam tsis zoo li peb siab xav, tsis txhob ntshov siab lossis npau taws, peb tso siab tau tias Nws muaj homphiaj zoo dua peb lub homphiaj,

thiab Nws yuav ua qhov xwmtxheej ntawd zoo rau peb (Saib Loos 8:28).

Peb yuavtsum totaub qhov no vim tej zaum thaum peb muaj teebmeem, peb yuav chim rau Vajtswv lossis lwm tus uas tau txais koob hmoov. Peb yuav muaj tus cwjpwv uas pom yus zoo dua, “Es, hais tias, Kuv yog tus ntseeg uas zoo dua koj. Kuv tsimnyog tau txais tej koob hmoov ntawd ntau dua naj.”

Xws li, tej zaum koj xav tau kev nce qib rau kev ua haujlwm, tiamsis ho muaj lwm tus tau mus hloov koj. Koj yuav ua li cas rau qhov no?

Koj yuav npau taws, ntsia tias koj zoo dua thiab ua rau koj sab ntsujplig raug mob. Lossis koj yuav tso siab rau Vajtswv es hais tias, “Tus Tswv yog tias no yog lub meejmom uas Koj xav kom kuv mus rau lub sijhawm no, kuv kuj yuav ua haujlwm nrog kuv tus tswv dejnum los ntawm lub ntsej muag luag ntxhi. Thiab Kuv paub tias yog Koj xav kom kuv mus ua lwm qhov, Koj yeej ua tau rau lub sijhawm uas tsimnyog.”

Kuv kawm paub tias Vajtswv ntse tshaj peb ibtxwm! Tej zaum Nws tsis pub yam uas peb xav tau rau peb

vim Nws muaj dua lwm lub homphiaj nyob hauv siab uas zoo – yam ntawd zoo dua qhov peb xav.

Xws li, muaj ntau zaus uas Vajtswv cia kuv dhau tej yam nyuaj. Tej lub sijhawm mas nws nyuaj dhau cai, tshwjxeeb yog thaum kuv pom lwm tus tau txais kev daws teebmeem rau tib zaj ntawd sai dua kuv.

Tiamsis thaum Vajtswv cia kuv mus saum txojkev no, Nws xav kom kuv paub thiab totaub yam uas tibneeg tabtom ntsib kom kuv yuav totaub txog lawv tej kev mob thiab yuav pab tau lawv kom hla dhau yam ntawd mus.

Yog tias tsis muaj lub sijhawm nyuaj siab hauv kuv lub neej – yog tej xwmtxheej uas tus Tswv siv kom pab kuv loj hlob thiab tau txais kev hloov – ces kuv yuav tsis txawj pab tibneeg coob leej li yam uas kuv niaj hnuv ua no.

Vajtswv tsis tau coglus rau peb tias peb lub neej yuav tsis muaj teenmeem, tiamsis Nws coglus tias yuav tsis tso peb tseg (siab Henplais 13:5). Nyob rau lub sijhawm nyuaj siab, peb yuav ua siab tus tau vim peb paub tias Nws hlub peb kawg thiab Nws twb npaj yuav

pab pab lawm.

VAJTSWV YEEJ NROG NRAIM KOJ NYOB KOM DHAU TXHUA YAM MUS

Kuv xav txhawb kom koj txiav txim siab ruaj nreeg kom tso siab Vajtswv rau txhua phab ntawm koj lub neej. Thaum koj raug cua daj cua dub lossis ntsib tej yam uas koj tsis totaub, qhov ntawd yog sijhawm uas yuav tau xaiv mus tom ntej rau txoj kev tso siab Nws – tsis hais koj yuav xav dabtsis lossis xav li cas, thiab tsis hais tej xwmtxheej nyob ib ncig koj yuav zoo li cas los xij.

Thiab thaum koj tso siab rau Vajtswv mus kom dhau txhua yam, Nws yuav muab yam ruaj khov rau koj – Nws yuav nrog koj ntau zuj zus.

Hnub no koj ntsib yam nyuaj dabtsi? Puas muaj kev txomnyem uas ua rau koj ntxhov siab? Yog hais tias muaj, Kuv xav txhawb koj siab kom siv lub sijhawm no los thov Vajtswv ib pliag li no.

“Tus Tswv, menyuam ua koj tsaug uas koj nyob nrog nraim menyuam ibtxwm – tsis hais thaum muaj kev zoo siab lossis thaum nyuaj siab. Thov pab

menyuam kom nyob ze Koj thaum uas menyuam tsis totaub lub neej. Menyuam tso siab rau Koj, thiab menyuam paub tias Koj yuav ua txhua yam kom zoo rau menyuam. Menyuam thov hauv Yexus lub npe. Amees.

Thov koj nco ntsoov tias, yam ua koj tabtom ntsib rau lub sijhawm no koj yuav tsis tau ntsib nws mus ibtxhis. Thaum kuv ntsib lub sijhawm uas nyuaj siab, Kuv nyiam hais rau kuv tus kheej tias, “Qhov no yuav dhau mus.” Nyob rau lub sijhawm ntawd, koj xaiv tso siab tau rau hauv Vajtsww thiab cia Nws muab kev xyivfab rau koj hauv tej yam nyuaj uas koj tabtom ntsib ntawd.

Nws kuj yog qhov zoo uas yuav tuav raww Vajtsww Txojlus thiab txhawb koj tus kheej los ntawm nqe Vajluskub zoo li Yaxayas 41:10. Vajtsww hais tias, *Koj tsis txhob ntshai, [tsis muaj dabtsi uas yuav ntshai] vim kuv nrog nraim koj, tsis txhob poob siab vim kuv yog koj tus Vajtsww. Kuv yuav pub zog rau koj, **kuv yuav pab koj...***

Lub sijhawm no tsis hais koj yuav ntsib dabtsi, Kuv thov txhawb kom koj sawv qhov kod thiab txhob yeem

swb. Txiav txim siab xav rau qhov zoo thiab tseem tso siab hauv Vajtsww. Vim Yexus nrog nraim koj nyob txhua qhov cua daj cua dub, thiab koj yuav tawm ntawm cua daj cua dub ntawd yam li tus neeg uas khov kho zuj zus.

-TSHOOJ 5-

TXHUA YAM PUAVLEEJ TSHIAB

Thaum koj plam kev vam thiab tas kev cia siab, xav txog yam dhau los uas Vajtsww tau pab koj mas yuav pab tau koj ntau kawg. Dua li no kuj yog kev txhawb koj tus kheej kom nco ntsoov Vajtsww txojkev ncaj ncees uas muaj rau lwm tus uas xav tau kev pab ntawm Vajtsww kuj zoo ib yam li koj yog kev txhawb siab rau koj tus kheej thiab.

Koj puas tau pom txhua tus neeg thooob plaws hauv phau Vajlugkub uas Vajtsww cia lawv pib dua tshiab?

Mauxes yog ib tug txivneej laus ua ntej nws yuav ntsib tsoob ntoo kub hnyiab thiab Vajtsww hu nws mus coj ib haivneeg. Txawm li cas los xij, ua ntej no, nws siv sijhawm 40 xyoo nkaum nyob hauv tiaj zeb suab puam! Nws tsis paub tias Vajtsww muaj homphiaj dabtsi. (saib Khiav Dim 1-4).

Daviv, ib tug tub yug yaj uas txo hwjchim, nws raug tsa ua vajntxwv kav cov Yixalayeess. Nws tsis muaj suab npe dabtsi los ua ntej – nws yog tus tom qab kawg uas raug xaiv los ua vajntxwv. Tiamsis Vajtswv siv nws los coj Nws haivneeg. (saib 1 Xamuyees 16).

Petus, tus timthawj uas tsis lees paub Yexus Khetos, nws tau txais kev zam txim thiab raug hu kom siv lub neej uas tshuav ntawd tshajtawm Txojmoo Zoo thiab ua yeebkoob rau Vajtswv. (saib Lukas 22:54-62; Yauhas 21: Tes Haujlwm 3).

Thiab **Paulus**, uas muaj ib zaug tau tsimtxom Vajtswv cov neeg, nws raug hloov ntawm txoj kev mus rau lub nroog Damaxes thiab xaus rau kev sau ntau phau Vajluskub Tshiab! (siab Tes Haujlwm 9:1-22).

Thaum koj xav txog txhua tus neeg thoob plaws hauv Phau Vajluskub uas Vajtswv tau zam txim, txhiv thiab siv txoj hauv kev phimhwj, Koj puas ntseeg tias Nws muaj peevxwm ua tau ib yam li ntawd rau koj?

Peb tus Vajtswv yog Vajtswv ntawm kev cia siab. Nws yog tus Vajtswv ntawm “ua dhau,” Nws pub sijhawm zaum ob, kev pib dua tshiab thiab ua yam

tshiab tau. Thiab Nws ua tau txhua yam tsis zoo li koj uas ua tsis tau txhua yam.

SAIB LOS NTAWM LUB QHOV MUAG MUAJ KEV CIA SIAB

Nco ntsoov tias kev cia siab yog tog hlau ntawm lub siab. Thaum tej yam saib zoo li tsaus nti thiab peb tsis muaj kev tawm, qhov ntawd yog thaum kev cia siab yuav ua haujlwm kom peb nco ntsoov tias peb li kev pib dua tshiab tabtom tos nyob ze ze tom hauv ntej no.

Thaum saib zoo li tias sawvdaws tau txais koob hmoov, tiamsis peb nkees thiab xav tso tseg, kev cia siab yuav ua rau peb lub siab ruaj khov thiab tuav peb kom ntseeg hauv Vajtswv lolus cog tseg.

Ib zaug ntxiv, kev cia siab yog kev vam uas zoo thiab muaj kev ntseeg siab. Nws yog tus cwj pwm uas xav rau qhov zoo thiab muaj kev vam uas zoo siab tias yam zoo yuav tshwmsim.

Kev cia siab tiag yuav tsis qaug dab qaug de, yuav tsis xav li no tias “tos saib seb yuav muaj dabtsi

tshwmsim,” tiamsis yuav ntseeg ruaj thiab tso siab tias Vajtsww yuav ua raws li coglus tseg. Vajtsww nrhiav sijhawm yuav ua zoo rau nws cov menyuam, thiab Nws xav kom peb muaj kev vam thiab tos ntsoov rau yam ntawd.

Nyob hauv 1 Thexalaunikes 5:8, kev cia siab txhais tias yog zoo li lub kausmom hlau. Yog li ntawd, yam peb xav yuavtsum tseemceeb heev. Peb tus cwjpwmm thiab txhua yam uas peb tabtom vam yeej ntsig txog yam uas peb tabtom xav thiab hais.

Kuv txhawb kom koj tswj koj tej kev xav thiab cov lus ua ntej txhua tagkis. Thaum koj sawv los, tsis txhob hais li no tias, Auj, Kuv twv tias hnuv no kuv yuavtsum siv zog ua kom dhau mus ib hnuv thiab lauj.

Tsis txhob xav li ntawd, tiamsis cia li muaj kev vam zoo ntawm Vajtsww. Xav thiab hais li no...

Vajtsww, menyuam ua koj tsaug rau hnuv no! Menyuam paub tias Koj hlub menyuam thiab muaj homphiaj zoo rau menyuam hnuv no. Ncaim ntawm koj lawm, menyuam ua dabtsi tsis tau li,

tiamsis hauv Yexus Khetos, menyuam ua tau txhua yam uas cheemtsum. Thiab los ntawm Koj kev pab, menyuam yuav muaj tus cwjpw zoo thiab xav rau qhov zoo.

Ces tos saib koj li kev kovyeej thiab kev pib dua tshiab hauv koj lub neej. Hais tias, “Hnub no yog hnub ua tiav!”

Yog tias peb xav muaj lub neej uas puv npo yam zoo, thiab muaj kev cia siab, qhov uas paub tias peb muaj tsis tau lub neej raws li yus kev xav mas yog qhov tseemceeb. Thaum muaj kev xav rau qhov phem, tiamsis yog tias peb tsis kam lees yuav thiab cia nws tswj yus, nws kuj ua tsis tau li cas rau yus.

Yog li ntawd, tsis txhob yeem kom koj tus kheej mag ntxiab ntawm kev tos kom yuav muaj kev cia siab, tiamsis yuavtsum txiav txim siab kom puv npo kev cia siab. Thaum koj txiav txim siab ruaj nreeg uas yuav xav rau qhov zoo, muaj kev xav uas puv npo kev ntseeg rau hnub ntawd, koj tej kev xav yuav mus raws koj li kev txiav txim siab xwb.

KAUJ RUAM TAWM NTAWM KOJ LUB TSEV NTAUB

Ntau xyoo dhau los, Kuv nug Vajtswv tias, “Vim li cas tsis muaj kev zoo siab, tsis muaj dabtsi tshwjxeeb tshwmsim hauv menyuam lub neej ntixiv lawm los?”

Vajtswv hais hauv kuv lub siab tias, “Joyce, Kuv tseem ua qhov ntawd ibtxwm. Koj yeej tau txais lawm koj tsis paub xwb.”

Vajtswv xav kom peb ua neej los ntawm xav tsis thoob txog nws tej kev zoo uas nyob hauv peb lub neej... ua tib zoo saib tej yam zoo uas Nws ua rau peb. Vim li cas? Vim thaum peb muaj lub neej hauv kev xav tsis thoob no, peb yuav tsis muaj hnuv tas kev cia siab! Cia peb los saib Anplahas lub neej ua ke...

Vajtswv tau foom koob hmoov rau Anplahas yam nplua mias. Txawm li ntawd los, tshuav ib yam uas nws thiab nws tus pojniam Xalas tsis muaj yog menyuam. Anplahas hais tias, *...tus Tswv, vim li cas Koj yuav muab rau kuv, rau qhov kuv twb tsis tau muaj menyuam li [hauv ntiajteb no]?*

Ces Nws (Vajtswv) coj Anplahas tawm mus rau nraum zoov (sab nraum tsev ntaub) thiab hais tias, “Koj tsa qhovmuag saib saum ntuj thiab suav cov hnuqbub saud saib koj suav puas txheeb.” Ces Nws hais tau Anplahas tias, “Koj yuav muaj xeebntxwv coob npaum li tej hnuqbub ntawd ntag” (Chivkeeb 15:2, 5).

Txawm tias zoo li Anplahas tej xwmtxheej tsis muaj kev vam, tiamsis tus Tswv coj nws tawm ntawm nws lub tsev ntaub los ua rau nws xav tsis thoob thiab qhia nws tias Vajtswv muaj peevxwm ua yam uas ua tsis tau kom ua tau.

Kuv ntseeg tias peb txhua tus siv sijhawm “nyob hauv peb lub tsev ntaub” ntau dhau lawm es pheej saib peb tej teebmeem xwb. Vim li ntawd, phau Vajlugkub thiaj hais tias kom muab tej kev ntxhov siab hauv lub neej tso tseg thiab tsom ntsoov rau Yexus, tus uas teeb txojkev ntseeg thiab ua rau peb txojkev ntseeg tiav (saib Henplais 12:2).

Txhua zaus uas peb txiav txim siab thov Vajtswv, nyeem Nws Txojlus lossis xav txog tej yam tseemceeb uas Nws tau ua rau peb yav dhau los, mas nws ua rau

muaj kev cia siab. Uas zoo yam li Anplahas, tsis ntev mas peb yuav xav tias, Auj...Nws ua qhov no rau kuv tau!

Thaum lub sijhawm nyuaj thiab koj qaug zog, nws yog lub sijhawm uas koj yuavtsum tawm hauv tsev ntaub thiab saib yam uas Vajtswv hais tseg cia. Thaum koj ua li ntawd, koj yuav pom tias Nws tos kom koj xav tsis thoob xwb.

OB NPAUG RAU KOJ QHOV TEEBMEEM

Yog tias koj zoo li kuv, koj yeej pom tias kev muaj kev cia siab rau lwm tus ua tau yoojyim. Kuv tsis tas ua dabtsi ntau uas yuav saib yam zoo thiab txhawb lawv los ntawm lolus hais tias, “txhua yam yuav zoo xwb – tsuas yog tso siab Vajtswv xwb thiab Nws yuav muab hloov kom zoo.”

Tiamsis thaum txog peb qhov ne? Nws yog dua ib zaj li lawm! Thaum peb nyob rau hauv kev mob lossis plam kev vam, peb yuav raug sim siab kom xav tias, *tas lawm lauj. Lig dhau rau kuv lawm lauj.*

Tiamsis tsis lig dhau! Nws tsis muaj hnuv uas lig dhau uas yuav pib dua tshiab thaum koj muaj lub neej hauv Yexus Khetos. Koj lub neej dhau los tsis yog koj

txoj hmoo. Yog tias koj tsis kam tso kev cia siab tseg, thiab yog tias koj yeem cia Vaj Ntsujplig tus Dawbhuv coj koj, Vajtswv tsis yog yuav txhim kho yam uas koj tau muaj tas los xwb, tiamsis Nws yuav ua kom koj lub neej zoo dua qub thiab.

Kuv nyiam phau Yau-Ees 2:25-26. Thaum koj nyeem, thov kom txojlus no yuav nkag hauv lub siab. Txais yuav hnuv no rau hauv koj lub neej.

Ntau xyoo uas tas los kooj txomfav noj nej tej qoobloo tas lawm, tiamsis nimno kuv yuav them rov qab rau nej, kuv yog tus uas tso cov tubrog no tuaj tawmtsam nej ntag. Nimno nej yuav muaj noj muaj haus nplua mias thiab txaus nej siab. Nej yuav qhuas tus TSWV uas yog nej tus Vajtswv, tus uas ua tej haujlwm zoo heev pab nej. Kuv haivneeg yuav tsis raug luag txob thuam ntxiv lawm.

Thaum tseem hluas, kuv raug ua kom ntseeg yuam kev tias kev raug mos thaum me ntxhais tau rhuav yam zoo ntawm kuv mus tas lawm. Kuv xav tias kuv yeej tsis muaj peevxwm ua tau zoo li lwm tus lossis kuv tsis muaj peevxwm muaj lub neej yam li kuv xav muaj tau.

Tiamsis Vajtsww ua tau txhua yam! Thaum peb pom qhov xaus, Nws pom qhov pib dua tshiab. Nws xav coj peb tej kev mob yav dhau los tawm mus thiab Nws tsis yog tsuas kho kom zoo xwb, tiamsis Nws xav txhim kho kom peb rov zoo ntau dua li uas peb muaj thaum chiv thawj!

Nrog kuv saib ntawm Yaxayas 61:7. Uas hais tias, *Kuv haivneeg yuav tau ob npaug los hloov qhov uas lawv txaj muag, lawv yuav tau kev xyivfab los hloov qhov uas lawv poob ntsej muag. Mas hauv lawv lub tebchaws lawv yuav tau ob npaug ua lawv teej tug, lawv yuav zoo siab xyivfab mus ibtxhis.*

Kuv pheej hais rau Vajtsww tias, yog lub homphiaj A ua tsis tau, ces Nws muaj lub homphiaj B ibtxwm – thiab nws zoo dua lub homphiaj A!

Vajtsww yog Vajtsww ntawm kev txhim kho thiab pib dua tshiab. Yog hais tias koj yeem cia Nws ua, Nws yuav cia koj pib dua tshiab – Nws yuav pub rau koj ob npaug! Mas nws yuav zoo dua li uas koj yuav xav txog.

-TSHOOJ 6-

Ntsia Mus Sab Saud Thaum Koj Nyuj Siab

Peb txhua tus yeej muaj lub sijhawm nyuj siab hauv lub neej vim muaj ntau yam laj thawj, tiamsis peb tsis txhob tso cai rau peb tej xwmtxheej los tswj tau peb txoj kev xav.

Xatas nrhiav kev ua kom peb lub siab xav txog tej kev phem uas ua rau peb tsis muaj kev xyivfab thiab muaj kev tu siab. Nws yog tus ua kom qaug zog, thiab nws rub peb tej kev xav kom poob qis, nws xav kom peb sab ntsujplig poob qis, nws xav kom peb li nyiaj txiag poob, thiab ua txhua txoj hauv kev uas nws ua tau.

Tiamsis Yexus yog tus txhawb peb zog, thiab Nws yog tus tsa peb sawv! Nws los pub kev ncaj ncees, kev thajyeeb thiab kev xyivfab rau peb. Nws xav kom peb

vam yam zoo rau peb lub neej tom ntej thiab hliv kom peb puv npo txoj kev cia siab.

Txhua tus neeg yeej tau ntsib lub sijhawm plam kev vam thiab ntxhov siab rau tej homphiaj lossis tej kev npau suav uas tsis tiav. Thaum tej ntawd tsis mus raws li peb vam tseg, kuj yuav ua rau peb qaug zog lossis plam kev vam.

Tiamsis peb yuavtsum ceevfaj seb peb yuav ua li cas rau tej kev xav no, vim tias yog peb tseem nyob li ntawd ntev, nws yuav ua rau muaj kev nyuaj siab tau.

Ntawv Nkauj 30:5 qhia rau peb tias... *Nws txojkev chim tsuas nyob ib pliaq xwb, nws txojkev ua zoo nyob mus tsis paub kawg li. Thaum tsaus ntuj muaj kev quaj ntsuag, tiamsis thaum kaj ntug muaj kev zoo siab.*

Tej yam yuav ua rau peb tu siab ib ntus, tiamsis peb yuavtsum tsis txhob nyob ntev rau txojkev tu siab. Yog hais tias peb ua li ntawd, yeebncuab yuav nrhiav kev qheb qhov rooj thiab yuam nws txojkev rau peb lub neej uas yuav ua rau muaj teebmeem hnyav tshaj qub.

Txawm li cas los xij, tiamsis los ntawm Vajtswv, thaum peb plam kev vam, peb muaj peevxwm txiav txim siab yuav txais yuav kev txhim kho dua tshiab ibtxwm. Peb muaj peevxwm xaiv ntsia mus rau ntawm Nws rau kev cia siab tshiab thiab rau lub zog tshiab uas yuav mus tom ntej tau.

MUAB SIAB RAU KOJ QHOV KEV XAV

Yog tias koj tau ntsib kev nyuaj siab, koj paub tias nws yog tiag tiag. Nws ua rau peb xav tias nyob ib leeg, thiab tsis muaj kev cia siab... zoo li txhua yam nyob ib puag ncig peb yaj tas.

Tamsim no, kuv paub tias kev nyuaj siab yog tshwm los ntawm lub cev lossis los ntawm tej tshuaj, thiab kuv tsis xav txo tias tsis yog tej no. Muaj tej lub sijhawm uas tus Tswv yuav coj tej leeg mus cuag kws kho mob uas txawj kho mob los yog tus kws kho kev puas siab puas ntsws uas yuav pab tau lawv tawm ntawm lub hauvpaus teebmeem. Kuv ntseeg tias kev txawj kho mob yog los ntawm Vajtswv thiab yog Nws li kev ua haujlwm dhau los ntawm tus kws kho mob ua tej yam zoo.

Txawm li cas los xij, rau ntau tus neeg, kev nyuaj siab kuj yog qhov teebmeem ntawm sab ntsujplig. Koj puas pom tias, Xatas siv kev nyuaj siab los nyiag lub hwjchim thiab kev ywj pheej sab ntsujplig ntawm tibneeg mus - nws nrhiav kev ua kom peb lub siab ntsws puv npo kev tsaus ntuj nti thiab nyuaj siab thiab ua rau peb poob siab.

Tiamsis Vajtswv xav pab peb kom muaj lub neej ywjpheej tsis muaj kev nyuaj siab. Nws xav ua kom peb muaj Nws txoj kev xyivfab, kev cia siab thiab kev vam ntawm tej yam zoo rau peb lub neej. Nyob rau kev koom nrog Nws, muaj ib yam uas peb yuavtsum ua yog kawm paub uas yuav tsis ua neej raws peb tej kev xav.

Kuv pheej hais tias kev nyuaj siab yuav ua peb tus yeebncuab loj tau. Nws yoojyim heev uas yuav raug kev xav rub mus, tiamsis peb yuavtsum paub tias peb tej kev xav – hloov mus hloov los tau txhua hnuh!

Peb tsis txhob ua raws li txhua qhov kev xav thiab txhua qhov kev xav uas yus muaj vim tej yam ntawd pheej cuamtshuam qhov tseeb uas Vajtswv hais txog peb.

Tau ntau xyoo hauv kuv lub neej, kuv tau ntsib kev nyuaj siab tsis tu ncuu li. Kuv sawv thaum sawv ntxov mas muaj ib lub suab nrov yau yau hauv kuv lub taubhau hais tias, “Kuv muaj kev nyuaj siab.” Kuv ntseeg tias qhov no yog kuv tus kheej li kev xav, kuv yeej tsis paub tias yeebncuab tabtom hais lus dag rau kuv lub siab.

Tom qab ntawd, thaum Vajtsww coj kuv mus nyob ze nrog Nws zuj zus thiab kuv pib kawm Nws Txojlus tiag tiag, kuv kawm paub tias kuv tsis tas yuav ua raws li txhua txoj kev xav thiab txhua txoj kev xav uas kuv muaj. Kuv pib hais suab nrov tawm tuaj tias “Kuv yuav tsis qaug zog lossis tsis nyuaj siab!”

Peb yeej yuav muaj tej kev xav – tej kev xav ntawd yuav tsis ploj mus. Tiamsis peb yuavtsum txiav txim siab xaiv, yog tsis yog li ntawd peb yuav tso cai rau tej kev xav los tswj peb lub neej.

SIV KOJ TXOJ KEV XAV

Txoj kev xav yog tus yuamsij tseemceeb uas yuav kovyeej txojkev qaug zog thiab kev nyuaj siab tau. Koj puas paub tias yam uas koj xav muaj hwjchim rau txhua phab ntawm koj lub neej?

Pajlug 23:7 hais tias, *rau qhov nws xav hauv siab li cas, nws kuj zoo li ntawd...*

Peb txoj kev xav muaj hwjchim! Thaum peb xaiv nyob nrog tej yam phem ntsig txog peb tus kheej lossis tej yam phem uas tshwm rau peb, qhov ntawd kuj cuag nkaus li peb tabtom pub zaub pub mov rau txojkev qaug zog thiab kev nyuaj siab kom loj.

Ntau xyoo dhau los, kuv tau tawmtsam kev mob qog ntshav mis, thiab nws yog lub sijhawm sim siab rau kuv. Kuv paub tias yog muaj dabtsi tshwmsim ntxiv mentsis ntshe Kuv yuav thev tsis taus lawm yog tias kuv cia kuv tus kheej xav qhov phem.

Nyob rau lub sijhawm ntawd, Vajtswv tso tej yam no los rau hauv kuv txojkev xav, ces kuv txawm hais tawm los nrov nrov ntau zaus li uas kuv ua tau. Kuv yuav xav thiab hais tias:

“Vajtswv, menyuam paub tias Koj hlub menyuam. Menyua ntsieg tias txhua yam yuav tshwm yam zoo rau tus uas hlub Koj thiab raug hu raws li koj lub homphiaj. Menyua thov tso siab rau

Koj, thiab menyuam yuav tsis ntshai.” (saib Loos 8:28, 35-39; Yausuas 1:9; Pajlug 3:5).

Koj puas pom tias, koj yimhuab siv sijhawm nyeem thiab xav txog Nws Txojlus ntau npaum li cas, koj yimhuab cia Txojlus nkag rau hauv siab ntau npaum li ntawd, koj kuj yuav tau txais kev hloov hauv siab ntau tuaj xwb.

Henplais 4:12 hais tias Vajtswv Txojlus muaj sia thiab puv npo lub hwjchim (phau NLT). Txojlus muaj peevxwm hloov tau txoj kev uas koj pom koj tus kheej thiab hloov tau koj lub neej yav tom ntej.

Thaum koj ntshiv koj txojkev xav los ntawm yam uas Vajtswv hais txog koj thiab lees paub Nws tej lus cog tseg rau koj tus kheej, txojlus ntawd kuj yuav coj kev cia siab thiab tsim koj txojkev ntseeg kom muaj zog tau.

KEV TAW QHIA RAW S LI VAJLUSKUB RAU KEV NYUAJ SIAB

Raws li kuv twb hais tas los lawm tias, qee zaus kev nyuaj siab tshwm los ntawm lub cev lossis los ntawm tej tshuaj, thiab kuv ntseeg tias kev yeem cia tus

kws kho mob pab peb raws li Vajtswv kev coj mas yog qhov tseemceeb. Tiamsis txawm thaum peb mus ntsib tus kws kho mob, kuv xav tias yog yam zoo ua yuav ruaj siab tias peb tso siab rau Vajtswv, tus uas yog peb tus Kws Kho Mob.

Txawm li cas los xij, ntau zaus kev nyuaj siab tshwm los ntawm kev ua rog sab ntsujplig...thiab phau Vajlugkub muab cov lus qhia zoo rau peb txog kev tawmtsam no.

Yaxayas 61:3 qhia rau peb kom hnav lub tsho ntawm kev qhuas rau tus ntsujplig uas nyuaj siab... (NKJV).

Tej zaum peb yuav tsis nyiam qhuas Vajtswv, tiamsis peb siv sijhawm ob peb feeb los tham nrog tus Tswv tau thiab ua Nws tsaug rau Nws txoj kev zoo mas suav tias yog ib yam cuabyeej uas muaj zog tshaj uas peb siv tawmtsam kev qaug zog thiab kev nyuaj siab tau.

Peb thov caw Vajtswv los rau hauv peb qhov xwmtxheej, mas yuav coj kev thajyeeb thiab kev xyivfab los rau peb.

Filipis 4:4 hais tias, *Cia li xyivfab rau hauv tus Tswv txhua lub sijhawm* [zoo siab, ua rau yus tus kheej zoo siab hauv Nws]; *Kuv rov hais dua tias, cia li xyivfab hlo!*

Kev qhuas tus Tswv nyob hauv nruab nrab ntawm peb qhov mob yog qhov loj tshaj uas peb ua tau. Vim li cas? Vim thaum peb xaiv ntsia ntsoov rau Vajtsww thiab zoo siab rau tej yam zoo uas Nws tau ua, peb kuj ua rau Nws loj dua peb tej teebmeem.

Qhov tseeb yog, Vajtsww yeej ibtxwm zoo, tsis hais dabtsi yuav tshwmsim hauv peb lub neej. Nws yog peb lub hauvpaus ntawm kev xyivfab, thiab peb muaj peevxwm khiav mus cuag Nws kom pab kho tau txhua lub sijhawm uas peb xav tau.

Qhov no koj kuv los rau Phau Ntawv Nkauj 16:11. Uas hais tias,...*muaj kev zoo siab xyivfab puv npo rau ntawm koj lub xubntiag, muaj kev zoo siab mus ib txhis nyob hauv koj txhais tes xis.*

Thaum peb pehawm Vajtsww, peb caw Nws los nyob hauv peb lub neej. Nws yuav pauv peb txojkev qaug zog chaw thiab kev tu siab los ntawm txojkev zoo siab xyivfab thiab kev thajyeeb...Nws pub kev cia siab

thiab muab lub neej tshiab rau hauv peb qhov xwmtxheej.

Peb hloov tsis tau txhua yam uas tshwmsim ntawm peb ib ncig, tiamsis qhov uas Vajtswv nrog peb nyob ntawd yuav hloov tau peb – peb yuav xav li cas, thiab peb yuav saib peb tej xwmtxheej li cas.

CIA VAJTSWV RIS KOJ QHOV MOB

Peb yuav tsis muaj hnuv dim ntawm kev mob lossis plam peb tej kev vam, tiamsis peb tsis tas yuav cia qhov tshwmsim hnuv no los rhuav tshem tagkis.

Peb muaj kev xaiv. Peb yuav ntxeev tej yam ntawd tau los ntawm kev txiav txim siab tso tej xwmtxheej uas ua rau qaug zog thiab nyuaj siab tseg, thiab mus rau tej yam zoo uas Vajtswv tau npaj tseg rau peb lub neej yav tom ntej.

Kuv nyiam 1 Petus 5:9, uas hais tias, *Cia li muaj siab ruaj hauv txojkev ntseeg tiv thaiv nws* [dab ntxwngnyoog]...[tawmtsam nws qhov kev tua rog]... tawmtsam kev tu siab thiab nyuaj siab yog yam tseemceeb uas yuavtsum ua tamsid, vim tias yimhuab

tseg cia ntev npaum li cas ces kuj yimhuab tawmtsam nyuaj npaum li ntawd xwb.

Kuv tau hais qhov no los lawm ntau xyoo tias: Yog tias koj tsis cia Xatas ua rau koj zoo siab rau yam nws ua, ces nws yuav tsis muaj peevxwm ua rau koj poob nyob hauv nws qab tswjhwm; thiab yog tias nws ua tsis tau rau koj nyob hauv nws qab tswjhwm, ces nws yeej ua tsis tau rau koj ntxhov siab.

Lwm zaus koj ntsib ib qho xwmtxheej uas yuav hem kom rub koj poob, cia li txiav txim siab tig mus rau Vaj Ntsujplig tus Dawbhuv thiab cia Nws ua rau koj muaj kev cia siab. Xaiv qhov uas yuav ntseeg ruaj yam uas Vajtsww hais es tsis txhob ntseeg yam uas koj xav. Ntxiv koj txojkev xav thiab koj lub qhov ncauj rau yam zoo thiab puv npo kev cia siab rau Vajtsww Txojlus.

Koj yuavtsum tsis txhob cia kev ntxhov siab thiab kev qaug zog los tswj koj lub neej. Thaum “muaj dabtsi tshwmsim rau lub neej,” cia li yeem rau Vajtsww tus muaj kev cia siab los txhawb koj zog thiab txhawb koj lub siab.

Txawm koj tabtom ntsib dabtsi los xij, Vajtsww txhij
thiab txaus siab yuav pab ris koj qhov kev mob ntawd...
thiab muab nws hloov ua yam zoo tau.

XAUS LUS

Koj Tabtom Ntsib Kev Nyuaj Siab Puas Yog?

Yog koj tabtom ntsib kev nyuaj siab, Kuv xav kom koj paub tias Vajtsww hlub koj. Nws pom yam uas koj tabtom ntsib, Nws nrog koj nyob, thiab Nws xav pab koj qhov uas koj ntsib.

Phau Ntawv Nkauj 34:18 (phau NLT) hais tias, Vajtsww nyob ze tus uas lub siab puas; Nws pab cov neeg uas ntsujplig raug tsimtxom. Thaum peb raug mob, Vajtsww kuj mob nrog peb thiab.

Tamsim no, tej zaum koj yuav ntsib tej xwmtxheej uas zoo li ua tsis tau. Tiamsis Kuv xav kom koj paub tias Vajtsww muaj peevxwm tsim yam tshiab tau. Nws muaj peevxwm muab koj qhov teebmeem hloov ua yam zoo tau.

Yog koj tabtom ntsib tej xwmtxheej nyuaj siab lossis tej yam uas tsimtxom koj es dhau qhov uas koj yuav tiv taus, Kuv yaum kom koj siv sijhawm ob peb feeb los thov Vajtsvw tamsim no:

Vaj Leej Txiv, lub sijhawm no menyuam xav tau koj. Koj hais tias Koj hlub menyuam thiab ntsia pom tias menyuam nyob rau ntu twg...thiab tsis hais menyuam yuav xav li cas, menyuam xaiv ntseeg Koj Txojlus. Nyob rau hauv txhua yam uas menyuam tabtom ntsib, menyuam tos ntsoov Koj kev pab. Menyuaam xav tau Koj lub zog kom yuav daws tau txhua yam uas menyuam xav tias nws loj dhau rau menyuam lub zog lawm. Thov pab kom menyuam ntsia ntsoov rau ntawm Koj. Thov qhia Koj tus kheej rau menyuam...thiab thov txhawb menyuam lub siab kom taug rau txoj hau kev tom ntej no. Thov pab kom menyuam paub Koj txojkev hlub thiab paub tias Koj nyob ntawm no. Menyuaam thov fij tagrho txojsia rau Koj. Thov hauv Yexus lub npe, Amees.

Kuv xav txhawb kom koj siv sijhawm mentsis thiab nyeem cov nqe Vajluskub hauv qab no. Los ntawm tej yam uas kuv tau ntsib los lawm, ua rau kuv hais rau koj

tau tias Vajtswv Txojlus yuav hloov tau koj lub neej – tsis hais koj txoj kev xav lossis txawm yog koj txojkev uas ntsia koj lub neej yav tom ntej.

Kuv nyiam phau Yelemis 29:11. Uas hais tias Vajtswv muaj homphiaj zoo rau koj lub neej yav tom ntej – yog lub homphiaj rau kev thajyeeb...yog lub homphiaj coj kev cia siab los rau koj.

Thov nco ntsoov tias Vajtswv nyob ntawm koj ib sab. Nws yog tus Vajtswv uas ua yam uas ua tsis tau kom ua tau... thiab yog Tus uas muaj peevxwm ua txujci tseemceeb tawm ntawm txhua qhov xwmtxheej tau.

VAJTSWV HLUB KOJ.

“Kuv tuaj deb deb tshwm rau lawv pom. Cov Yixalayeas, kuv yeej ibtxwm hlub nej, kuv yuav hlub nej mus ibtxhis.” *Yelemis 31:3.*

“Tej zaum cov hauv roob thiab pov roob yuav tawg mus, tiamsis kuv txojkev uas hlub koj yuav tsis paub kawg li...” Tus TSWV uas hlub koj yog tus uas hais tej lus no. *Yaxayas 54:10.*

Koj twb suav kuv tej kev ntxhov siab, thiab khaws kuv tej kua muag rau hauv koj lub thauv, thiab muab sau huvsia cia rau hauv koj phau ntawv lawm. **Ntawv Nkauj 56:8.**

“Kuv twb paub koj ua ntej uas kuv tsim koj rau hauv lub plab, thiab thaum koj tsis tau yug hauv plab los kuv twb muab koj cais cia rau kuv lawm...” **Yelemis 1:5.**

VAJTSWV YUAV PAB KOJ.

“Nej tsis txhob ntshai, rau qhov kuv nrog nraim nej, Kuv yog nej tus Vajtswv, nej tsis txhob poob siab; Kuv yuav pab nej thiab txhawb kom nej muaj zog, kuv sab tes xis yuav puag rawv nej. **Yaxayas 41:10.**

Tus Tswv, txawm yog kuv taug txojkev uas tsaus ntuj nti los kuv tsis ntshai dabtsi, rau qhov koj nrog nraim kuv...**Phau Ntawv Nkauj 23:4.**

Kuv thov tus TSWV, thiab nws teb kuv tej lus thov, nws cawm kuv dim ntawm tej kev txhawj ntshai huv tibsi lawm. **Phau Ntawv Nkauj 34:4**

Thaum nej hla tej dej tob, kuv yuav nrog nraim nej lossis nej mus hauv dej, dej yuav tsis tshoob nej. Thaum nej mus hauv cov nplaim hluavtaws, hluavtaws yuav tsis kub nej; txojkev sim siab no yuav txov tsis tau nej. **Yaxayas 43:2.**

VAJTSWV YOG KOJ TXOJKEV CIA SIAB.

Kuv tib leeg thiaj paub tej uas kuv npaj yuav ua rau nej, kuv yuav pab kom nej vammeej tsis yog ua kom nej puastsuaj, nej thiaj muaj kev cia siab rau yav tom ntej. **Yelemis 29:11.**

...Kuv yuav tsis ncaim koj thiab yuav tsis tso koj tseg kiag li. **Henplais 13:5.**

Rau qhov tsis muaj ib yam dabtsi uas Vajtswv yuav ua tsis tau. **Lukas 1:37.**

Thaum kuv ntshai kuv tso siab rau koj. Ntawv **Nkauj 56:3.**

VAJTSWV YOG KOJ TXOJ KEV NPLIJ SIAB THIAB LUB ZOG.

Nws kho cov neeg lwj siab thiab qhwv lawv tej qhov txhab. [kho lawv qhov mob thiab lawv txoj kev tu siab] Ntawv Nkauj 147:3.

Nws pub zog rau tus uas tsaug leeg, thiab txhab zog rau tus uas tsis muaj zog...Tiamsis cov uas tos rawv Yawmsaub [tus uas vam ntsoov, nrhiav, thiab cia siab rau Nws] yuav tau zog tshiab tuaj...lawv yuav dhia tsis txawj txog siav, lawv yuav mus kev tsis txawj tsaug leeg. **Yaxayas 40: 29, 31.**

Txhua tus uas ua haujlwm khwv thiab ris lub nra hnyav, cia li los cuag kuv, kuv yuav pub nej tau so los siav. [Kuv yuav ua rau nej lub siab tau so thiab tsis muaj kev txhawj thiab txhawb koj lub siab.] Mathais 11:28.

Vajtswv yog peb lub chaw cawm siav thiab yog peb lub zog, yog tus uas pab rau txhua lub sijhawm uas raug ceeblaj. **Ntawv Nkauj 46:1.**

Lus Thov Vajtswv Kom Tau Txais Kev Cawm Dim.

Vajtswv hlub koj thiab xav nrog koj sib raug zoo.
Yog tias koj tsis tau txais yuav Yexus Khetos los ua koj
Tus Cawmseej, Koj txais yuav Nws tau rau lub sijhawm
no. Koj tsuas qheb siab rau Nws thiab thov Vajtswv raws
li ntawm no...

“Vaj Leej Txiv, menyuam paub tias menyuam tau
ua txhaum rau Koj lawm. Thov zam menyuam lub txim.
Thov ntxuav menyuam kom dawbhuv. Menyua thov
coglus tias yuav tso siab rau Tswv Yexus, Koj Leej Tub.
Menyuam ntseeg tias Nws tuag rau menyuam – Nws
twb ris menyuam tej kev txhaum lawm thaum Nws tuag
saum ntoo khaublig. Menyua thov Nws sawv
hauv qhov tuag rov qab los. Menyua thov fij menyuam
txojsia rau Yexus tamsim no.

“Vaj Leej Txiv, thov ua Koj tsaug, rau Koj qhov khoomplig uas yog kev xam txim thiab lub neej ntev dhawv mus ibtxhis. Thov pab kom menyuam ua lub neej nyob rau Koj. Thov hauv Yexus lub npe, Amees.”

Thaum koj thov Vajtswv tawm los ntawm koj lub siab, Vajtswv twb txais yuav koj lawm, Nws twb ntxuav koj thiab ua rau koj dim ntawm ua kev tuag sab ntsujplig qhev lawm. Thov siv lub sijhawm no los nyeem thiab kawm Vajtswv Txujlus thiab thov Vajtswv hais lus rau koj thaum koj ua neej nrog Nws mus rau txojkev ua neej tshiab no.

Yauhas 3:16 1 Kauleethaus 15:3-4 E f e x u s 1 : 4
Efexus 2:8-9 1 Yauhas 1:9 1 Yauhas 4:14-15
1 Yauhas 5:1 1 Yauhas 5:12-13

Thov Vajtswv thiab thov kom Nws pab kom koj nrhiav tau ib pawgntseeg zoo – uas ntseeg phau Vajluskub kom koj thiaj li tau txais kev txhawb kom loj hlub rau kev nrog Yexus Khetos sib raug zoo tau. Vajtswv yeej nyob nrog nraim koj. Nws yuav coj koj mus ib kauj ruam rau ib kauj ruam txhua hnuv thiab Nws yuav qhia kev ua neej nplua mias uas Nws npaj tseg rau koj.

YOG KOJ TWB NPAJ TXHIJ

*yuav pib ua neej rau txojkev no nrog Yexus lossis
yog tias koj xav paub Nws kom tob zog tuaj, koj mus
saib ntawm no:*

joycemeyer.org/KnowJesus

HAIS TXOG TUG SAU

Xh. Joyce Meyer yog tus sau ntawv uas muaj ntawv ntau tshajplaws huv New York Times thiab yog ib tug ntawm cov xibhwb txawj qhia Vajluskub hauv ntiajteb no. Los ntawm Joyce Meyer lub koomhaum ua Vajtsww tes haujlwm, nws qhia kom xyaum ua yam ncaj mus ncaj los, qhib siab qhia nws tej kev paub ntawm nws lub neej tiag tiag thiab tau pab tsheej lab tus neeg kom txawj siv phau Vajlugkub rau tej xwjtxheej hauv lub neej thiab thaum kawg tau ntsib kev cia siab thiab kho dua tshiab hauv Yexus Khetos. Nws phau ntawv hu ua Kev Ua Rog Sab Kev Xav, yog ib phau ntawv uas muag tau zoo tshajplaws ibtxwm, yog phau ntawv uas qhia txog txojkev ua rog yeej txojkev xav thiab “xav txog yam uas lawv xav.” Xh. Joyce ua rooj sablaj loj thoob tebchaws Amelikas thiab ua mus thoob ntuj, thiab nws tes haujlwm hu ua Lub Neej Kaj Siab muaj nyob hauv TV., muaj nyob hauv xovtooj cua thiab muaj nyob hauv online rau ntau lab leej mloog ntau tshaj 100 hom lus. Nws yog tus sau ntawv ntau tshaj 130 phau, uas tau muab txhais ntau tshaj 155 hom lus.

LUB KOOMHAUM JOYCE MEYER

Qhia Yexus Khetos Zaj – Hlub Tibneeg

Lub Koomhaum Joyce Meyer raug hu los qhia Txojmoo Zoo, kom tsim txhua haivneeg los ua Yexus thwjt看 thiab muab Yexus txojkev hlub rau lwm tus.

Los ntawm kev tshaj xovxwm peb qhia tibneeg kom txawj siv qhov tseeb hauv phau Vajlugkub rau txhua yam hauv lawv lub neej thiab txhawb kom Vajtsww cov neeg ua haujlwm rau lub ntiajteb uas nyob ib puag ncig lawv. Los ntawm peb tes haujlwm hu ua Txhais tes ntawm Kev Cia Siab, peb tau pab haivneeg E-talias thoob ntuj, pub zaub mov rau cov neeg tshaib nqhis, pub khaubncaws rau cov neeg txomnyem, ua Vajtsww tes haujlwm rau cov neeg laus, cov poj ntsuam, thiab cov menyuam ntsuag, thiab peb tseem ncav cuag txhua phaum neeg thiab txhua hom neeg li kev ua neej.

Lub Koomhaum Joyce Meyer yog tsim los ntawm lub hauvpaus kev ntseeg, kev ncaj ncees thiab cov neeg txhawb nqa uas koom nrog Vajtswv kev hu no.

Yog xav tau Koomhaum Joyce Meyer tej ntaub ntawv, kev hais lus xovtooj cua Lub Neej Kaj Siab uas hais txhua hnuv kom ntau zog lossis xav paub txog tes haujlwm Txhais Tes ntawm Kev Cia Siab, thov mus saib ntawm;

tv.joycemeyer.org